

रवि शाक्य, इखाछेँ, यल

ॐ नमोबुद्धाय

गोकर्णेश्वर वीतरागकथा



लेखकः—

पण्डित, कविराज, ज्योतिष

मोहनराज वज्राचार्य

भिछेवाहा, ललितपुर

ॐ नमो बुद्धाय

गोकर्णेश्वर वीतराग कथा

भाषायाह्न

पण्डित, कविराज, ज्योतिष

मोहनराज वज्राचार्य

भिच्छेवाहाः, ललितपुर ।

प्रकाशक

सानुकाजी वज्राचार्य

भिच्छेवाहाः, ललितपुर ।

नेपालसंवत् ११००
स्वायांपुत्री
प्रथम संस्करण १०००

अन्य प्रकाशनाधिका लेखकयाके सुरक्षित
मूल्य १/३५

मुद्रक
लुष प्रेस
पुलचोक, ललितपुर ।

भूमिका

पितृया कारणे श्राद्ध यानां छु ज्वीगु श्राद्ध मयासाँ छु ज्वी दान मयासाँ छु ज्वी धका धाईपिं श्राद्ध यानाया दान यानाया पुण्य धर्मम स्यू गुलिं श्राद्ध याय गुलो उत्साह मदु पितः श्राद्ध याय्मागु खः धका धवाथ्वी वयतः गोकर्णेश्वर वीतरागयागु कथा छगु चवयाव्यु जिं प्रकाशयाय् धका भिछेवहाले च्वंहा सानुकाजि बज्राचार्यं धागुलिं थ्व गोकर्णेश्वर वीतरागयागु कथा चवया विया ।

थ्व ग्रन्थे गोकर्णराजकुमारं छःपिं बुढा जुल तपोवन विज्या- हुं जिं राज्य चलेयाय् धागुलिं वीह्य वृषकर्ण महाराजां अवाच्य खँल्हाह्य कुपुत्र राज्ये तेमखु धका राज्यं पितिना हल गोकर्ण- राजकुमारं वौ यात द्रोहयागु पापं नरके लाःवन । अन नरके वौ यात अन्याय याना वं पित छेने कालचक्र ही का सास्ति याना तंगु थाय् जुया च्वन अन कालचक्र हीकातवह्य पापि गोकर्णराजकुमारयात छँ वौयात द्रोहयाना वल ज्वी वौ यात द्रोह याना ओपिं जक थन नरके लाःवइगु आः छंगु छचने काल- चक्रं हिला सास्ति नकिगु जुल धका कालचक्रे च्वंहा पापि धागु न्यना गोकर्णराजकुमार ग्याना विस्युं वया ले' नापलावह्य

बुद्धोपासक यागु उपदेशं पितृद्रोह पाप फुकेत गोकर्णेश्वर वीत-
 रागे, वया तपस्या यात अले गोकर्णराजकुमार यात रक्षायाय्
 त गगनगञ्ज बोधिसत्व विज्याना गोकर्णराजकुमारयात धाल
 हे राजकुमार छं वौ वृषकर्ण महाराजा छं अग्निसंस्कार पिण्ड-
 दान मयागु लिं अगति जुयाचवन । उकिं ह्लापां छं वौ यात
 पिण्डदानया अले छंगु पितृद्रोह पाप फुनावनी छं वौ नं सुगति
 लाइ धका धागु गगनगञ्ज बोधिसत्वयागु उपदेशं वौ या नामें
 पिण्डदानयात थुगु काय्या ह्लातं पिण्डदानकया वृषकर्णराजा
 स्वर्ग वन । गोकर्णराजकुमार यानं पितृद्रोहपाप नाश जुया
 राज्यभोग याना सुखावती जन्म का वन धयागु कथा श्राद्ध
 पिण्डदान यागु प्रशंसा आमुष्मिक क्रिया दान यानागुया फल पुण्य
 नं चवया विया जुल । थुगु सफु प्रकाशनया निंति आग्रह याह
 सानुकाजि वज्राचार्य यात दुनुगलं निस्यं धन्यवाद यानाचवना ।
 थ्व सफुया प्रकाशन लेखकया स्वाधीने तयागु दु । अस्तु ॥

- पण्डित, कविराज, ज्योतिष
 मोहनराज बज्राचार्य
 भिछेवाहा, ललितपुर ।

ॐ नमो बुद्धाय ।

बुद्धयात नमस्कार ॥

मैत्रेय बोधिसत्त्व थः च्वनागु थासं दनावना थगां
न्यया पुलिं पृथ्वी मण्डले चुया श्रीशाक्यमुनि भगवान्
यागु खास्वया लाहानिपां बिन्तियाया प्रार्थना यात.
निराकार जुया च्वंगु गोकर्णेश्वर यागु कथा न्यन्येगु
ईच्छा जुल आज्ञादयका विज्याहुं धका मैत्रेय बोधिसत्त्वं
बिन्तियागु न्यना श्रीशाक्य सिंह भगवानं मैत्रेय बोधि-
सत्त्व यात आज्ञादयका विज्यात गथ्यधालसा हे मैत्रेय
बोधिसत्त्व ह्लापा पूर्वकाले ककुछन्द भगवानं धर्माकर
राजायात आज्ञा दयका विज्यागुथ्यं सकल सत्त्व प्राणि-
यात हितयायथा कारणे संपूर्ण गोकर्णेश्वर यागु कथा
जिकन्य न्यो हे मैत्रेय पुरा पूर्वकाले उत्तम जुयाच्वंगु
पांचाल धयागु सहर दु थुगु सहरया राजा नीतिवान्
जुया च्वंह्य सम्पूर्ण शास्त्रसया विज्याकह्य अनेक धनया
भण्डार सहित जुया विज्याकह्य थुह्य राजाया गोकर्ण
धयाह्य काय् मचा दु थुह्य राजकुमार राजलक्षणं संयुक्त

जुया रूप लक्षणं शोभा दया च्वंह थुह्य राजकुमार दहने
 वूगु पलेस्वाँथ्यँ वह्ने जुया रूप यौवनं अतिशोभाय मान
 जुया ल्याह्य जुया वस्यैलि थुह्य राजकुमारं थवथ्य थमं
 बुबा महाराज यात त्रिन्ति यात गथ्यधालसा भो पिता
 वृषकर्ण महाराज । छ पि बुढा जुल जित राज्याभिषेक
 विया तपोवन विज्याहुँ छ.पि सन्थं सन्तु मंत्री आदि
 सकल प्रजालोकपि प्रतिपाल याना जि राज्यभोग याना
 च्वने धका राजकुमारं काय्न् धागु न्यना मनं सहयानां
 सहयाय मफयका दुर्बुद्धिह्यकाय् यात स्वया राजां तमं
 आज्ञा दयका विज्यात अरे चाण्डाल पापात्मा ! धायमज्यूगु
 योग्यमजूगु खं छं धाल जिगु राज्ये जि इच्छाथ्यं राज्य-
 भोग याना च्वना हे कुपुत्र ! जिगु राज्ये च्वनेमते देशं
 प्याहां हुं धका बुबा राजां धागु न्यना तमं राजकुमारं
 धाल अरे महालोभिह्य बौ छं पि बुढाज्वी धुंकल अथ्यया
 कारणे बुढा गुलितक स्वाई भतित्रा मखुला स्वाना च्वनी
 स्वलाया भित्रे छं पि सिना वनी अले थ्व पाञ्चाल देशे जि
 राजा ज्वी धका राजकुमार काय्न् धागु न्यना महाराजां
 काय्यात धाल रे रे चाण्डाल कुपुत्र गोकर्ण ! छं जित अप-
 मान यात छः काय् मखुत जि शत्रु खः अथ्यया निंति
 छ शत्रु यात राज्याधिकार धनसंपत्ति पितृद्रोह याह्य
 कुपुत्र जूगुलि वी मखु दूतया ह्लाती विया राज्यं पतिना

छोय धका धया तमं राजां राजकुमार यात दाल अले
 राजकुमारया शरीरं हि बा बल अबुं दागु सहयाय मफया
 तमं राजा यात धाल रे रे पापात्मा चण्डाल ! जि शत्रु छ
 बौ मखुत अरे शत्रु छंगु कुबीजं जि म्वाना चवने माल हा
 धिक्कार ! संसारे जन्म जुयागु राजकुले जन्म जुयागु व्यर्थ
 जुल राजकुले जन्म जुयागु मखु शत्रुया कुले जन्म जुयागु
 जुल धका धया तमं बौ यात दाल थनं लि हे मैत्रेय !
 महाराजा वृषकर्ण दूत यात सःता धाल हे दूत जि शत्रु
 काय् यात देशान्तरे दुर्गमे बने सुंमदु थाय वांछ्वया वा
 कुसन्तान दयां छुयाय् मभिगु पुसा पिना छु फल सै धका
 धया दूत यात अह्ने यास्यलि बौ यात राजकुमारं हानं
 धाल अरे शत्रु वृषकर्ण छ याकनं सिना बने माँ छन्त अ-
 गति याना तये अले छ अगति जुया गन वनी शत्रुयात
 जल दाननं याय् मखु जि जलदान अग्नि संस्कार
 पिण्डदान मयानागुलि छ नरके वनी

नरकात्त्रायत इति लोकानां पुत्र एव तु -नरकं तरे
 याइह्य जूया निति पुत्र धागु खः धका धया अतितमं
 श्राप विया राजकुमार गोकर्ण देशं पिहाँ वन ॥ ॥ थनं
 लि राजा बौनं नं श्राप विया छोट बौ यात द्रोह घानागु
 पापं याकनं नरके लाःव न्यमा धका निह्यस्यां परस्पर
 श्राप विया कह याना राजकुमार थुगु देशतोता मेगु

देशे वन वं वं मेगु देशं नं वनान्तरे लाःवन बौ यात द्रोह
यागु पापं मिखा कांह्यथ्यं जुया वनान्तरे वं वं यमदूतपि
चवना चवंगुथासे यमद्वारे कर्मभूमि (कर्मभोग यायमागु)
महानरके बौ यागु श्रापं याता ला-वन ॥ ॥

थुगु बखते अन नरके महापापिह्य छह्य पुरुष खन
थुह्य पुरुषं मां बौ यात द्रोह याता ओगु पापं । तः मागु
सिमास चिना छेने कालचक्र फनननं हीका तओगुलि
न्हचपु हि बाबा वया चवन ॥ वहे थवगु शरीरं वा वया चवंगु
ह्तेपु हि नया चवंह्य थुह्य पुरुष स्वया विस्मय चाया
गोकर्ण राजकुमार ग्याना हालाचवन अहो दु-ख महाकष्ट
छुया नितिं थुजोगु नक्सां दु-ख विया तल धका हाला
गोकर्ण राजकुमार हालास्वया चवन ॥ थुगु बखते अन
पितृद्रोह याता ओह्य पापिं राजकुमार यात धाल भो
महापुरुष भो साधु थन छ गनं वयाह्य थनजा सदाकालं
दु-ख सिया चवन मागु कर्मभूमि महानरक ख- ॥ धका
धागु न्यना गोकर्ण राजकुमारं धाल भो पुरुष थुजोगुनक्सां
छन्त सुनां दु-ख विया तःगु धका न्यस्यंलि कालचक्र ही का
त-ह्य पापिं धाल हे महाभाग आ छुयायू पूर्वजन्म यागु
पापं जूगु थौं थुजोगु दु-ख नयेमागु सुनानं यागु मखु पूर्व
जन्मे मोहं बौ यात जिं द्रोह याता वया थुगु पापं थन
यमद्वारे जिं कर्म भोग याता चवने माल बौ यात द्रोह

६ मयापिं थन वैमखु छ नं बौ यात द्रोह

याना वलज्जी उकिं छ थन ला वल आ छंगु छेनेनं
 कालचक्र हिला कालचक्रं प्रहार यायी जिगु दुःख गथ्य
 छः अथ्य हे छं दुःख भोग याना कष्ट नै ह्यछ ज्जी उवयं
 कदापि (गुबले सं) बौ यात द्रोह यायमत्यो धका थूहा
 पापिं धागु न्यना थमनं बौ यात अपराध याना वयागु क-
 र्म लुमना अत्यन्त ग्या ना गोकर्ण राज कुमार उख्यं थुख्यं
 स्वया कालचक्रे च्वंहा पापियात स्वया दु-खी स्वरं धाल
 हा! धिक्कार संसारे जिजन्म जुयागु जि बौ यात अपराध
 याना कुकर्म याना वया हा हा हा थन जि सहाय (का-
 सापि) सुं मदु दयानं छुयाय् कर्म भूमि यमद्वारे धर्म जकं
 तरे यायी जि धर्म याना मवया पापजकं याना वया आ-
 थन जित्त सुनां रक्षा यायी हा हा हा जि आ- छु मति
 ज्जीगु जुल हानं थन चोना चवन धासा निश्चय नं महा
 दु-ख ने मालि आतल्य यमदूत पिस्पं जितः मखंनी थन
 दु-ख सीमालीगु जुल आ- गन वने गन वने धका पिपि
 च्या च्यां हाल अले कालचक्रे च्वंहा पापिं धाल पूर्वजन्मे
 गु गु याना वल उगु उगु कर्मभोग मयास्यं मगाः कर्म ध-
 यागु भोग मयास्यं गुवले फुना वनी मखु अथ्यया कारणे
 भो पुरुष छ योयोथाय् हुं अनअन कर्मया खिप्तं चिना
 नरक भोग याकेहै भो साधु छं गु पाप मफूतले मननं
 वन्य स्वा धका कालचक्रे च्वंहापापिंधागु न्यना अत्यन्त

ग्याना यमद्वारं गोकर्ण राजकुमार हथा हथासं पिहां व-
 या त्रिस्पुं वया ववंववं मेगुले दुद्धोपासिक छह्ण खन व
 बुद्धोपासिकयात स्वया तत्कारणं व्वाय् व्वाय् वना पुलि
 निगलं पृथ्वी मण्डले चुया दु-ख लुमंका लाहानिपां वि-
 न्तियाना थुह्ण बुद्धोपासिक यात नमस्कार याना थुगुप्रका
 रं आदरभाव तथा विन्तियात ॥ भोबुद्धोपासक गन
 विज्याय्त् विज्याना जिगुभाग्यया प्रभावं छः पिं नाप
 लात, हे नाथ जिं छुयाय छपिके जिं छ गुखं विन्तियाय्
 जिन्थनागुखं सत्यथ्यं आज्ञा दयका जिगु चित्त बोधयाना
 विज्याहुं धका विन्ति यास्यंलि बुद्धोपासकं धाल हेमहा
 पुरुष थन छन्त छु शंकाजुल जिं छन्त छु धाय् माल धा
 धका आज्ञाजूस्यंलि गोकर्ण राजकुमारं विन्तियात भो
 बुद्धोपासक मेगु मखु पितृद्रोह (वौ) यात द्रोहयानागु पाप
 छु यासा फुना वनी थुगु उपाय आज्ञादयका विज्याहुं ध-
 का विन्ति यागु न्यना बुद्धोपासकं आज्ञादयका विज्यात हे
 साधो ह्लापा भगवानपिस्यं आज्ञादयका विज्यागु पितृद्रोह
 पाप मोचन ज्वीगु उपाय दु छं याय् फसा या- जिकने, छु
 धालसा नेपाले हिमालय पर्वतया संनिधाने अमोघ फल
 दायनी व वागमती संगम जुया च्वं गु संपूर्ण पाप शोधनया
 ना च्वंगु छ गु तीर्थ दु थुगु तीर्थ सुनां श्रद्धातया यथा वि-
 धिथ्यं षडक्षरी मन्त्र जाप याना स्नानयाना तपस्या यायी

थुह्यसिया सम्पूर्ण पाप नाशजुया श्री गुणया खानि जू ह्य
 ज्वी धका ह्याया सकल बुद्ध भगवान पिसं आज्ञा दयका
 विज्यागु दु अथ्यया कारणे हे साधु छं पितृद्रोह पाप नाश
 यायया कारणे अनतीर्थे तपस्या याः हूं धका बुद्धोपासकं
 धागु न्यना गोकर्णराजकुमारं तथास्तु धका बुद्धोपासक
 यात नमस्कार याना हे गुरु जि वने धका तत्कारणं नेपा-
 थ्यंक वया क्रमथ्यं ग्राम ग्रामान्तर नाघेयाना गोकर्ण
 राजकुमार पुण्य तीर्थे थ्यंक वया आकसंनिस्यं नमस्कार
 याना पुण्य तीर्थे स्नान याना बछि हूँ लखेदुना छपा ह्ने
 पं लखे दुंका यथा विधिथ्यं षडक्षरी मन्त्र जप याना
 त्रिरत्न यागु नां स्मरण याना पले स्वां छाया सकल
 प्राणि यात उद्धार याय्गु मतीतया ध्यान याना तपस्या
 याना च्व च्वं ङि निदं वर्ष वितेजुया वस्यंलि हे भिक्षु पि
 थुह्य गोकर्ण राजकुमार या बौ वृषकर्ण राजा सिना वन
 उगुबखते वृषकर्णराजाया काय्गोकर्णराजकुमार अन
 राज दर्वारे मद्गु अग्निसंस्कार जलदान आदि मेपिसं
 याना छोट धर्म शास्त्रं गथ्य चोयातल अथ्य अथ्य पिण्ड
 दान आदि यात अथ्य यातसां तवी काय्मचा यागु ह्या-
 तं जलदान पिण्डदान मयागुलि वृषकर्ण महाराजा प्रेत
 जुया ह्नि ह्नि राजदर्वारे वया सिकं पीडाबिया हा- वया
 चवन ॥ हा पुत्र छंगु ह्यातं जित पिण्डदान व्यू छंगु

ह्लातं पिण्डदान यासा जिउद्धारज्वी छंगु लहातं
 पिण्डदान काय्मखंगुलि जि अगतिजुल जि काय् गोकर्ण-
 राजकुमार गनवन गुथाय्वन धका थुमु प्रकारं हाला
 राजा भयति जुया राजमृहे बया सीकं सीडा विद्या च्च-
 न ॥ धयातगुनं दु पुत्राप्नो नरकाद्यस्मात् पितरं प्राय-
 ते सुत- । तस्मात् पुत्र इतिप्रोक्त ॥

बौ यात नरकं तरे याईहा जूयानिति काय् यात
 पुत्र- धका धयातल ॥

दग्धेदेहे पुनर्देहपिण्डैरुत्पद्यते तनु ॥

अतोदद्यात् सुत- पिण्डान् दिनेषु दशसुध्रुवं ॥

मि उनाछ्वे धुनगु शरीर पिण्डदान यानागु लि हान
 शरीर उत्पत्ति ज्वी, उवयं काय् मचां दशपिण्ड आदि-
 निश्चयनं थय्मा, दशपिण्ड थया उत्पत्ति जूगु शरीरहा
 प्रेत यमद्वारे कथंथयं अनेक अनेक दु-ख कष्टनय् मागु
 सैमापुर १ सौरीपुर २ नगेन्द्र भवन ३ गन्धर्व ४ शै-
 लागम ५ क्रौञ्चपुर ६ विचित्र भवन ७ बह्वापद ८
 दु-खद ९ नानाक्रन्दपुर १० सुतप्त भवन ११ रौद्रपुर
 १२ श्वर्णिनिगुपुरे क्रमथयं लाः वनी थुगुणिनिगुपुर
 यागु अनेक अनेक कष्टनया दुःख भोग याय् म्वाकेत
 लेलेपत्ति मास पिण्ड थयमाल थथिजागुपुरे शास्ति

नैमालिगुखँ थनचोसा आपालं थवसफू त- धं ज्वी उर्किं
 थवखँ थन मच्चया थुगु नरक यामु, नरके दुःखभोग
 यायमालिगु खँ जिं प्रकाश यानागु संसार वृत्तिसाधन
 ग्रन्थे च्वया विद्यागु दु ॥

पिण्डदान आदि काय्मचां धर्म कर्म याना विलसा
 पितृ सुखावतो वनी अथ्यया नितिं दशपिण्ड मार्सिक
 पिण्ड आदिं याय्माल यदि काय्मचां पिण्डदान मयात्त
 धन-सत्र बौ तरे ज्वीमखु हानं पिण्डदान मयाह्य काय्माल
 पितृ आप बो अले पितृ श्रमं याना काय्मं नरक वनी
 उर्कं पिण्डदान याय्माल ॥ गोकर्ण राजकुमारं बौ बृ-
 षकर्ष राजायात्त पिण्डदान मयाभुलि अगति जुय
 द्वारे पोडा विद्याच्वन ॥ थन यागुखँ थुलि ॥ ॥

थुगु चखले थन पुण्य तीर्थे गोकर्ण राजकुमारं व्र-
 तयाना तपस्या याना च्वंशु अंकनिष्ठा भुवने विज्या-
 कहा लोकेश्वर श्रीकरुणामयं स्वया गमनगञ्ज बोधिसत्व
 यात्त आज्ञादयका विज्यात्त मथ्य धाःसा भो गमनगञ्ज
 बोधिसत्व मर्त्यलोके नेपाले पुण्यतीर्थे गौकर्ण राजकु-
 मारं अति श्रद्धाभाव तथा कष्टं तपस्या याना च्वंगु किं
 निदं दयावन अथया कारणे थव गोकर्ण राजकुमार यात्त
 छं उद्धार याना वा धका लोकेश्वर श्रीकरुणामयं
 आज्ञादयका विज्यागु न्यना श्री गमनगञ्ज बोधि-

सत्त्वं अति करुणा कृपा तथा गोकर्ण राजकुमार यात
 उद्धार याय्यानिति पलेस्वां ज्वना आकाशमार्गं
 जिगु दिशासं तेजं खय्का क्रमथ्यं थुगु पुण्यतीर्थे थ्यंक
 विज्यात थुगु वखते गोकर्ण राजकुमारं तेज प्रकाश जुया
 ओगु स्वया उख्ये थुख्ये जिगु दिशासं सो वले महा-
 मती जुया विज्याकहा गगनगञ्ज बोधिसत्त्वं खना हथा
 हथासं दना व यना अतिहर्षमानयाना लाहामिपां वि-
 न्ति याना चरण कमले भो पुया नमस्कार याना विन्ति
 यात, हे गगनगञ्ज बोधिसत्त्व छ ! पित्त नमस्कार हे
 प्रभु जिगु अपराध क्षमायाना जि यानागु पाप फुका
 जित उद्धार याना विज्याहुं धका विन्तियास्यांलि गग-
 नगञ्ज बोधिसत्त्वं आज्ञादयका विज्यात हे साधु थुगु
 छंगु पाप नाश ज्वीगु उपाय जि कने न्यं हे गोकर्ण
 राजकुमार छं बौ वृषकर्ण महाराजा सित छंगु लाहातं
 पिण्डदान मयागुलिं छं बौ वृषकर्ण राजा अगति जुया
 च्वन छंगु लाहातं पिण्डदान मयायकं सद्गति लाइ मखु
 अथ्ययानिति ह्लापां बौ यानामं पिण्डदानया अले छं बौ
 नं सद्गति वनी छंगुनं थुगु धर्मं पाप नाश ज्वी धका
 गगनगञ्ज बोधिसत्त्वं आज्ञा दयका विज्यागु न्यना त-
 थास्तु धका धया गगनगञ्ज बोधिसत्त्व यागु आज्ञा
 शिरे धारणा याना यथा विधिथ्यं अन्न १ तीर्थजल २

कूश ३ सादु दु ४ छ्यो ५ धौ ६ साख ७ कस्ति
 श्वते पितृया शरीर उत्पत्ति जुईगु अष्टाङ्ग पिण्ड ज्व-
 रेयाना संकल्प याना पिण्डदान यायत पितृ निमन्त्रणा
 यागुलि वृषकर्ण महाराजा हथा हथासं पिण्डदान का-
 यत थुगु पुण्यतीर्थे थ्यंक वया काय् गोकर्ण राजकु-
 मारया ह्ल्योन्य खारा जुया च्वन ॥ थुगु वखते गोकर्ण
 राजकुमारं जि यानागु पुण्यं जि बौ वृषकर्ण राजा सु-
 खावती भुवन वन्यमा धका प्रणिधान् याना अन्न
 आदियागु बुद्धचैत्य दय्का नैबद्यं धर्मयागु स्वरूपं
 पञ्चगोमातादयका संघया स्वरूपं मत दय्का कूशं
 मूर्तिदय्का धर्मशास्त्रे कनातओथ्यं पिण्डदान यात, श्व
 पिण्डदान यागु वृषकर्ण राजां कया राजां काय् यात
 आशीर्वाद विल भो पुत्र छंगु लाहातं जित पिण्डदान विल
 थुगु पुण्यं छंगु मनोरथ पुरे ज्वीमां धका आशीर्वाद विया
 अगति जुया च्वंहा वृषकर्ण राजा पुत्रयागु धर्मं सु-
 खावतो वना मोक्ष प्राप्त जुल ॥ ॥

थनंलि गोकर्ण राजकुमारं कृपाया खानि जुया
 विज्याकह्य गगनगञ्ज बोधिसत्व यात पञ्चोपचार पूजा
 याना हर्षमान याना स्तोत्रयात ॥ ॥

नमस्ते बोधिसत्वाय सत्त्वानां तायिनेनमः ॥

नमे पद्महस्ताय आकाशादागताय ते ॥

सत्त्व प्राणि यात रक्षायाणा तरे याणा विज्या-
 कह्य पलेस्वां ज्वना आकाशं विज्याकह्य हे गगनगञ्ज
 वोधिसत्त्व छलपोल यात नमस्कार धका थुगु प्रकारं
 स्तोत्र याणा गोकर्ण राजकुमारं विन्ति यात हे नाथ
 गगनगञ्ज वोधिसत्त्व छलपोलयागु प्रसादं जि पितृद्रोह
 यानागु आदि पापनाश जुल हे नाथ छलपोल यामु
 सदाकालं सेवा याणा चवने थन हे छःपि वासयाणा
 विज्याहुं धका गोकर्ण राजकुमारं विन्ति यास्यंलि म
 गगनगञ्ज वोधिसत्त्व आज्ञादेका विज्यात हे गोकर्ण रा
 जकुमार थथ्य धाय् मते संसारे सत्त्वप्राणि यात रक्षा
 याय् निति उख्ये थुख्ये चाहला जुयाह्य जि जिगुतेज
 त्वहंते लीनयाणा थके जिधका भा पा भजनाया धका
 आज्ञादयका थवगु शरीर यागु तेज त्वहंते लीनयाणा
 गगनगञ्ज वोधिसत्त्व आकाश मार्गं अन्तर्धान जुया
 विज्यात । उकेया कारणे थुखुनुनिस्यं गगनगञ्ज वोधि-
 सत्त्व यागु तेजलीन जूगुया निति गगन लिङ्गेश्वर धया
 गुनां प्रसिद्ध जुल । गोकर्ण राजकुमार उद्धार जुया वं-
 गुलि गोकर्णेश्वर वीतराग धयागु नां जुल ॥ थनंलि
 गोकर्ण राजकुमारं थुगु गगनगञ्ज वोधिसत्त्व यागु
 तेजलीन जूगु त्वहं गगनगञ्ज वोधिसत्त्व भालपा नम-
 स्कार याणा प्रबक्षिणा याणा क्षमा फोनाथायगु पाञ्चा-

ल देशे वया राजा जुया राज्यभोग याना श्रीकरुणा
 मय यात स्मरण याना अष्टमीव्रत याना प्रजालोक
 पिन्त प्रतिपाल याना चवन ॥ थनंलि कालसमय थ्यं
 स्यांलि गोकर्ण महाराज मृत्यु जुया सुखावती जन्मका
 वन धका श्रीशाक्य सिंह भगवानं आज्ञादयका विज्यागु
 न्यना सैत्रेय वोधिसत्व आदि सभा लोकपिं हर्षमान याना
 चवन ॥ ॥ विशेषणं थुगुतीर्थे यथा विधिथ्यं पत्यस्वानं
 स्नानयाना पत्ये स्वांछाया ज्योतिरूप गगनगञ्ज वोधि
 सत्व यात भाव याना पिण्डदान यात धाःसा थथिन्येपिं
 पूरूष पिंगु सम्पूर्ण पाप नाश जुया सुखावती जन्म
 कावनी ॥ ॥

इति श्री गोकर्णेश्वर वैतराग प्रसिद्ध महात्म्य
 समाप्तः ॥ ॥

मयूर वर्ण विहारे ललितपुर पत्तने ।
 जिजन्म जूगु नेपाली दोछि वनी चिछिसालसः ॥१॥
 वज्राचार्य कुले जन्म मोहनराज नां जिगु ।
 सिधलका थद चोयागू ह्ने गुदं जिदुगूवले ॥२॥

आःथन संक्षिप्तआमुष्मिक

क्रियाचवेत्यना ।

वैतरनी नदी तरेयायत-सा दानवीगु

अष्टदानधयागु हामो १ नँ २ लुँ ३ कपाय् ४ चि ५

जग्गा ६ सा ७ सप्तधान्य ८ अन्तकाले दानयाःगु

थ्व अष्टदान यांनाया फल-हामोस्वता दान यांना गुलिं

काय, वाक्, चित्तं, यांनागु पाप नाशज्वी ।

नँ-दान यांना गुलिं-यमद्वार या गुलेँ लाः वनी मखु ।

सूग ; खड्ग, खोचा, कथो, शस्त्र, पा, यमदूत पिसं
पापितेत शास्ति नकेत ज्वना च्वंगु शस्त्र यागु भय ने
म्वा केत नँ दानयायगु ।

लुँ, दानयांनागुलिं-यमराजा आदिं देवतापि संतुष्ट ज्वी
कपाय्-दानयागुलिं-यमदूतयागु भयदैमखु ।

चि. दानयांनागुलिं-यमराजा यागु भय दैमखु ।

नँ. चि-कपा-हामो-लुँ-दान यांना गुलिं-चित्रगुप्त

आदिं यमपुरे वासयांना च्वंपि संतुष्ट ज्वी । सप्त
धान्य धयागु-तछी १ छो २ मू ३ माऽ४ प्रियङ्गु ५
चाना ६ वृही ७ दानाया नागुलिं-यमराजा या किजा
धर्मध्वज आदिं स्वंगु द्वारे च्वंपि संतुष्टज्वी ॥

भूमिदान यानागुलि- ब्रह्महत्या आदि पाप नाश जुया
वनी ।

मचां सहितह्य सा-दान यानागुलि-संपूर्ण पाप नाश ज्वी ।
थवगु मूर्ति दान याना गुलि-मां वौ यात अपराध याना
गु पाप नाश ज्वी ।

चन्द्रमाया मूर्ति-दान याना गुलि-अवीचिनरके शास्ति
नेमाली मखु ।

सूर्ययागु मूर्ति दान याना गुलि-रौरव नरके शास्ति
नेमाली मखु-

जल दान याना गुलि-प्रेत जुया शास्ति ने माली मखु
म्लेच्छ गति जन्म ज्वी स्वाकेत-पिण्डदानयागु अति-
सार नरक तरे याय्त-तुफि दान याय्गु कुष्ठरोग शान्त
याय्त-गृह (छेँ) दान याय्गु दुःखाति दुःख नरक तरे
याय्त-पिण्ड दान याय्गु अधोमुख नरक तरे याय्त-
बुद्ध सेवा याय्गु दशाकुशल पाप नाश याय्त-दशदान
याय्गु दशदान धयागु- सा १ भूमी २ हामो ३ लुं ४
धयो ५ कपाय् ६ वा ७ चाकु ८ ओह ९ चि १० थव
जिता यात दशदान धाई

कृमि, कीट, योनिं मुक्त जुयत-श्री खण्ड आदि गन्ध द्रव्य
दान याय्गु ।

अन्धकार नरक तरेयाय्त-दीप दान याय्गु ।

खोचाया गुलं तरे याय्त-ग्रामेलँदेकेगु ।

असिपत्र नरक तरेयाय्त-छत्र (कुसा) दान याय्गु ।

अग्निधत न नरक तरेयाय्त-द्योपिथाय् होम याय्गु

प्रेत नदी तरे याय्त-सा. दान याय्गु

सीनावंहा प्रेत लछि दैवले-सौम्यपुरेश्वनी श्व पुर यागु

दुःख नेम्वाकेत-लः थल दान यागु ।

निला दैवले नगेन्द्र भवन थ्यनी श्व पुरया दुःख ने स्वा-

केत लुं अंगु दान याय्गु ।

स्वला दैवले गन्धर्व पटन श्वनी थुगु पुरयागु दुःख ने

स्वाकेत लकां दान याय्गु ।

प्यला दै वले शैलागमपुर थ्यनी थुगु पुरया दुःख नेस्वा-

केत कुशा दान याय्गु ।

न्यालादैवले कौश्रपुर थ्यनी थुगुपुर यागु दुःख ने स्वा-

केत खङ्ग दान याय्गु ।

षुला दैवले क्रूर पुर थ्यनी थुगुपुर यागु दुःख नेस्वाकेत

दुंगादान याय्गु ।

न्हेला दैवले विचित्र भवन थ्यनी थुगुपुर यागुदुः खने

स्वाकेत अन्न दान याय्गु ।

च्याला दैवले वह्वापदथ्यनी थुगुपुर यागु दुःख नेस्वा-

केत लुं अंगु दान याय्गु

गुला दैवले नाना क्रन्दपुर थ्यनी थुगुपुर यागु दुःखने

म्वाकेत सिंहासन दान याय्गु ।

ठिला दैवले सुतप्त भवन थ्यनी थुगुपुर यागु दुःख ने
म्वाकेत क्वापा लकां दान याय्गु फ़िछला दैवले रौद्र
पुर थ्यनी थुगुपुर यागु दुःख ने म्वाकेत दण्ड दान
याय्गु ।

ठिनिला दैवले पयोबर्षणपुर थ्यनी थुगुपुर या दुःख नाश
याय्त् पातवस्त्र दान याय्गु ।

दानं विभूषणं लोके दानं दूर्गत्ति निवारणम्

दानं स्वर्गस्यसोपान दान शान्तिकरः शुभः ॥१॥

दान धयागु लोके तिसा जुया च्वन दानं नरक वने म्वा-
ला च्वन दान धयागु स्वर्ग वन्यगु सोहाने जुया च्वन
दानं याना संपूर्ण शान्ति जुया च्वन ॥१॥ अथ्यया
कारणे दान धर्म याय्माल । परलोके दानधर्म समान
मेपि पासा दैमखु ।

लेखकः—

पण्डित, कविराज, ज्योतिष

मोहनराज बज्राचार्य

भिछेवाहा

लेखकया प्रकाश ज्वी धुंकुगु सफु

नेपाल भाषा

- १ शाक्य सिंह या वीर प्रतिज्ञा
 - २ मंगलाष्टव स्वस्ति वाक्य भाषा टीका
 - ३ संसार वृत्ति साधन-यमद्वार कथा
 - ४ सर्वज्ञ मित्रावदान
 - ५ रूपावत्यवदान-भगवान बुद्ध मिसाजुया जन्म जूगु
 - ६ उपोषधा वदान--अष्टमी व्रत कथा
 - ७ गोकर्णेश्वर वीतराग कथा
-

अन्य प्रकाश ज्वीगु

१. बोधिचर्यावतार अनुष्टुप्छन्द
नेपाल भाषाटीका
२. वीरकूशा वदान
नेपाल भाषाटीका